

# **Tesalonike nyo pö Odeny**

*Ompö Kighöni chomi kighetu*

Amtaghata Sirimnyonto pöropchö

Ghömicho omtoghi pöropchö





# TESALONIKE NYOPÖ ODENY OMPÖ KIGHÖNĪ CHOMI KIGHETU

## KINETUTYO TAGH 1

### A. Kitöröt

- Mwoghate lö kikirā Paulö palayantanete korinto otinö kimi rutoghtanyi nyopö odeny nyo pö amtagh.

*“Paulö, Sila nko Timoteyö, kikirchinecha Kanisa nyomi Tesalonike nyomi ompö Töröröt paapö, nko ompö Echotyön Yeso Kristo: Nya kimi parakunkwa pö ropchö nko kalya, nyo ng’wino Töröröt nyole paapönyo, nko Echotyön Yeso Kristo.” 1 Tesalonike 1:1*



- Kīmi Sila nko Timoteyo atakong’a nko Paulö otini kikiröy nyinte palayantanete kukirichini kanisa pipö Tesalomike pö kinyiwut nyoman kesiwena Paulö kimwa karaku Kanisanī lö, mitoni “ompö Töröröt paapö nko ompö Echotyön Yeso Kristo” kikiketo chane kighong’öt ompö Kristo akikikītöpīsö chane kutwayta kegh Kristo.

*“Ani Paulö nyo kakiir palalyantanī nko silwano kimi nko Timoteo. Kokirchan pipö kanisa chomi Tesalonike, cho kalikī pipö paponyo Töröröt nko Echotyön Yeso Krist. Osoghan paponyo Töröröt nko Echotyön Yeso Kristo lö tökonokwa pöropchö nko kalya. 2 Tesalonike 1:2*

- Toro Paulö palaltinechi takwes nyopö pöropchö nko kalya (Rumi 1:7, 1Korinto 13, 2Korinto 1:2, Katatya 1:3, Epeso 1:2).
- Kiröy nyinte kënyil cho chang' lö weröy kighönï ong'eryö nko kömpöleluut, akimöchöy nyinte kunan chane lö ng'wino



Pöropchönko kalya wölo mii Töroröt, akimukecha kesikö kimukat kepesteghena mikulögh.

- Kipesteghecha poor, mokimukechanye takelimta pöropcho Töroröt nko kalyenyi.

### **B. Kichichimat.**

*“Kimtecha keyokyine Töroröt sörö kinomnyö ompö akwa, werköcha kële wölini rumunote lö mii këghetu kughenateng'wa nyoman, akïtasa chomnyogh, nyole nyikwa, akwane nko akwane; nka nyonö kakesikecha syolot otöptöbkwa ompö kaniseni Töroröt ompö mikukönötekwa nko kighanat ompö kichopata kong' nko ng'wonintin cho kyomikukönökwa” 2 Tesalonike 1:3-4*

- Ale atanye kikirchini pipö Korinto cho kipestegho poor, kitor Paulö kuporchï chane tikwïn cho köpöghitu kichichimat ompö chane (1Korinto 1:4-10)
- Ompö yete kung'at ketö Paulö pipö Tesalomike salat ompö kighanatengwa, chomnyogh nko mikukönöt ompö kichopat.
- Amwoghöy nyinte lö kikönöteng'wa nko ketighö kegh Echotyoon kimi këghetu osiis nko osiis akï lö chomnyeng'wa ompö tupchenikwa kimi këghetu.



- Ayomis nete nyay kigh Töroröt kuwerï Paulö ompö **Rumi 8:28-29**, kiyomis këwaghak tikwïn lapay ompö söponwecha këkaramachitu.
- Kïmi kanisa Tesalonike kuweröy kichopata kong' nko kichopat, kisir kelikï cho meghyot mikulis akewöghökisyeghö wölo mii Töroröt, kimi këghetu wölo kitigho

kegh chane Töroröt, akilenye nyoni chomnyeng'wa ompö tupchenikwa.

- Kïmökecha möchutköcho; ntomökimi pipö Tesalonike ompö pöroyin nyo pö ong'eryö, kitömösiköcha makat kītighö kegh Echotyoon, amelö kötökīghetu ompö kighanat.
- Lenye nyoni tikwilempö söponwecha. Otini pkonöy nīkisīntinö, ompö pöropcho Töroröt, ketighochakegh nyinte, akighetu chomnyencha ompö piich walaka.
- Wölo atokipesteghocha poor, alikunecha kö ring'isyot mikuloy aketepecha Töroröt teput nyinö kötö kiköneche akemung'ö aketighö kegh nyinte.
- Kitas tagh Paulö kimwa lö ompö kanisen walaka, kisik syolöt ompö söwintöno kanisa Tesalonike ompöwölo kī korkeyin chane nyo wow nyo poru wölo pöghisyegho Töroröt pöroyin pö nīkisyö kuchīchim kighanat nko ketighenocha kegh nyinte (Rumi 5:1-5)
- Kilenyona, kisyolöy Paulö chane parak lee körkeyin ompö kinisen walak.
- Kimukecha kegh kigh nyo köröy kegh nko nyoni. Otini kīsikecha pöroyin keneta piich walak, kimukecha kecheng'a lee körkeyin nyo kīpöghisyegho chane cho pesitegho mikulögh.



### **C. Kipöghisyegho Kichopata kong' Kechichiim Kighanat.**

*“Nyole kiporunogh nyopö konutyö kirwok nyo satat nyopö Töroröt, Tökeyitok lö cho mīchinot ompö pöyunöto Töroröt, nyini omitekwa tikwil osiko nyaril.” 2 Tesalonike 1:5.*

- Mwoghöy Paulö lö kīmi pipö Tesalonike kighetu ompö mikulögh, kī kiporunögh lö kigh Töroröt kigh nyo roko ompö kīpīsī nyaril ompö achane.

- Ompöwölo kimöchöy kighöni Tesalonike kimöng'öy ompö Tililyö ompö Kristo Yeso, kikichop kong' chane (2Timoteyö 3:12).
- Kipöghisyeghō Töröröt nyaril kuchichum kighanateng'wa ompö nyinte, akunet chane kipestegha mikulögh.
- Otini kitas tagh chane kitighökegh Töröröt akipestegha mikulögh, kitas tagh akwa mikulögh kuporī kegh kuwerī chane, akilikī nyu chane chō köröy kegh nko Kristo.
- Keröto Töröröt kewaghak kighönī lapay kīkarkegh nko körkeyintanyi (Rumi 8:29).
- Ore nyoni kiwöghökonecha keraracha kegh nko nyinte kī napat nyo toro sörünöt akītas tagh (2 Korinto 3:18) kokay ompö möng' encha.
- Otonö kopkochecha acheyi nka pöroyintö nyo cheng'öy, ghecha ngoni kemikönchinö pikö walaka ompö chomnyogh chona chinto akimi kunoghyo kīkörökegh nko Kristo.
- Ompö poor, kilikunecha cho kikitöy tya chane chona mii kiporyo ompö mikulgh; kinonecha ng'at lö kömichini kunkiti lesiny.
- Ompö mikulögh, mii pköchiin lö ate chona mii nko nikisīn



- akipestegho poor kipöghisyegho Töröröt kusilta kerötenyi ompö sopenwo monechi.
- Ompöwölo ting' Töröröt owesy lapay akunkit lapay, akī chömöy akughanate nyoman kimukecha kesikö kiminy kiripkegh nko sopenwecha nko chopö chane cho witwitecha (2 Korinto 5:16a)

#### D. Kirwokintonay Awes

*“Ighöt Töröröt kigh nyo tenate: kerchini pichoni ighokwa owongune kuwongu. Tyokokwa cho kakeyarilak akikonok kiminy nko acha tikwil. Ighöy Echotyoon Yeso ngölyontontononi otini körumunö yim nko malaikenichi cho owesöch, nko ma nyo tingeto*

*Iyöpot, atökuchop kong piich cho meghancha Töroröt nko cho matercha Lökoyechi karamach ngölono Echotyontencha Yeso. Wonguno chane kiwurat nyo pö kokay, kipwsyegho chane wölomi Echotyoon nko wölomi owesyenyi nyo Töroor, otini itu nyinte Asisoni atökitcha pikachi cho kakyghan konyit. Olikunekwa tikwil akonga ompö pichoni, ompöwölo kaghanakwa ngölyontonanya kikipucha wölo otitekwa.” 2 Tesalonike 1:6-10*

- Nko nye kipöghisyegho Töroröt kichopata kong' ompö köromnyo söponwo kighöni, melö kömwöghöy lö mötopönönye chane cho nyörilöy kong' menochi.
- Kiyomis, Töroröt panpo kuweri Paulö lö chane cho chopöy kong' kighöni Tesalonike kënyoru sitötasiisakong'a.
- Otini king'win Yeso ng'winy nyo tagh, king'win kiliki sörunoto lapay; yenyu otinö milo ng'winy kung'at, ng'winöy lee kirwokin nyo awes akurwoyü chane cho kitagh kughan amtagh.
- King'winatanete pö Yeso otini ng'winöy këcheng'öy monechi.
- Otini kanyapana këcheny monechi ompö milaghatanyi, chane cho kimeghö “ompö nyinte” këpetöy parak kitach nyinte wölo meng'winönye nyinte takwitü ng'winy.
- Wölo, asiis akong'a mïto nko malaykenichi chö pö owesyö, nko chane chö kighan nyinte, akïrökï nyu ntakwitü ng'winy.
- Ompö köröwonto lö, këröy Paulö lö otini kamïla Yeso nko kanisenyi, chane lapay chö ghönöy nkïtu chane nyu wölo awesta nyinte kiliki akïsolöy akikïting'chï nyinte.



*“Nko nyoni këmitecha kesoghwokwa osiis lapoy. Kïsoqhecha Töroröt lö teghakwa alikuna piich cho mëchini ghecha lö tengarachakwa ompö owesyenyi, atamucha awanya machatengwo nyo karaam atamucha agha pöghisyengwo nyo pö kighanat kumuchö. Nyoruno kënyit wölo omitekwa kainata Echotyontenyö Yeso, anyorunekwa tikwil wölomi nyinte, ompö pöropcho Töroröt nko Echotyontenyö Yeso Kristo.” 2 Tesalonike 1:11-12*



- Ompö köromnyo Töröröt lö ighöy nyinte acheyete wöghököy monechi kīkarkegh nko Kristo (Eprania 13:20-21)
- Kīlenyona, kimwa Paulö lö soghöy nyinte Töröröt kitas tagh nko acheyete ompö söponwecho, takīnyighī tya nko tya ompö möng’o Kristo (Rumi 8:28-29)
- Otinö tösöy tagh söpo Kristo, nyini kīsīwegho möng’o manechi, kīsīköy Kristo syolöt.
- Nyete nyu acheypa mīkulögh nyo Tīlil (1) kuntaghoghtech wölomii Kristo; (2) kunyīghitenecha Kristo; (3) Tökesyol Kristo.
- Mwoghöy Paulö lö syolo Kristo ompöwölo kīmitecha orinyi, kesīkecha syolöt tīkwīl ompö nyinte; akwighisyot chete lapay ompö pöropcho Töröröt.
- Otini lee tagh, kikīchicha chemwokīyis; pung’pö Töröröt, chö kiroke kiwurata nyo pö kokay ompö anam pa maa, akepesyö nko Töröröt kokay (Epeso 2:11-12).
- ***Nya kīkwolo Töröröt nyole papoto Echotiontenyo Yeso Kristo. Ompöwölo kakusoyonecha kulinyencha nko Kristo nyo konecha ropöwo mukulögh ompö mongot nyo mii yim. Kikīlecha Töröröt ompö Kristo könyisyok kītomö ketowī ng’wīny, atökemucha ketīlilituno akelikī piich cho puryö leluut ompö taghunyi, akelikī piich cho tīng’eto chomnyogh nyo wow. Ompöwölo kinya kilöwönecha ompö ara Yeso Kristo akumītwecha wölini mii nyinte kelikuna werkachi, kīrip kegh nko chamatenyi nyo wow. Ompö salat nyo pö ororyo pöropchenyi nyini keghecha cho tokote ompö chaman, Ompöwölo kaketyakecha ompö megha Kristo akelostowecha ngokicho kīripkegh nko wöwinto poropchenyi; Epeso 1:3-7***

## 2 TESALONIKE OMPÖ KIGHÖNĪ CHOMĪ KIGHETU

### KINETUTYO ODENY 2

#### A. KINETUUT CHOPÖ PUTINTÖN

- Ompö kuka 2 kinetöy kegh kerötyo Paulö otinö kiröy 2Tesalonike nyo tang'ogh kĭng'eta atay kikir Tesalonike nyo tagh.
- Rumu lö kĭmi kelĭso pipö Tesalonike kinetut pö puntintön.

*“Yenyu kĭsomecha akwa, tupchenichu, ompö king'winata Echotyön Yeso Kristo, nko ompö ghömichenyo kutang'wölo miii nyinte, lö tömökĭtimtimok lawel ompö kinonutkökwa, anta osuskegh, töptoy ompö mikulögh, anta ompö ng'ölyön. Anta palalyan nyo ng'wĭno wölo mitecha, kĭle wölo kĭlekĭtiit asiispa echotyön.” 2 Tesalonike 2:1-2*

- Ompö kinetutyenyö nyay pö Tesalonike nyo tagh kakinet kegh kĭgh nyo igho ompö mĭlaghpa Kristo.
- Itu nyu osiswö chole mutnko odeny, chopö nörekyo nko kirwokenyi ompö paraku chane cho katagh kughan ng'ölyoon.
- Ompöwölo kinyoru pipö Tesalonike kichopat nko nyorilwok, kĭkigh chane kĭghan lö kĭkĭkwitĭ mĭlaghpa Echotyön nko nyonö kĭmi chane kuweröy nyarĭl.
- Waghakatanetepö man kĭnglölyön nyo kipöghit ng'wonĭn nyoman.
- Ompö köröwonto 2, kimwochi Paulö chane lö mosus kegh ompö kanan lö kĭkutor kinyarĭlata kong'akĭlö kĭkuwer chane cheng'ata tötomöy nyinte yenyu kiporunögh chopö kichopata kong'

*“Makĭlĭsak chii ompö oor anka tikwil: ompöwölo metunye asisoni ntökĭten kwitĭ mĭlaghpa löt, akepori nyu chipö ng'okĭ, wero kiwurat: 2 Tesalonike 2:3*

- Mwoghöu Paulö lö kītomö kwitī pöroyīn nyopö kirwok töghoy piich cho chang' Echotyön.
- Kīmi Paulö kīng'ölono kanisa, ompöwölo kikītagh tay ng'wīnya nyī meghönönye nyinte.
- Otinö kakīmwa lö wöghokegho kanisa wölomi Töröröt. Rumunot nyoni lö man nyini kītöghöy, akwigh nyoni nyu kwitī chopata kighanat.
- Ghönöy piich cho chang' mantanoti töghöy kanisa ompö pöroyīntönoni, man nyo pö antagh, nko nyo pö ghetunöto mīkulögh.
- Ompö Tesalonike nyo tagh mwoghöy Paulö lö, “menuch mīkulögh.”
- Ompö taghata manpa Rumi 6 kīle pchöri mwatatenycha nyopö mīkulögh akenoghyechī kemögh'ö möng'o Kristo ompö poor nko owesyencha kegh, kīnuko mīkulögh; sörömu nyu, kepörtoghchicha Töröröt patagh (Cheramiya 17:5-6).
- Nyo,rīpöy kiröy Paulö kiporunöte anka nyo pö pöroyīnpö kichopat, lö “kiporu chipö ng'okī.”
- Otino kakisomön paku ng'ong'ut, kinatöy kegh lasing paraku chichete.
- Pusyini nyinte paytagh akīchömöy nyinte ng'wīnya akīpka ng'wīnyu owesyenyi nko kintaghoghatenyi.
- Töni nyinte onyötö owesyö kīlīs akīpayta ng'winy.
- Nkīt onyötö lö mīlo Yeso napo asiis akong'a akīcheng' pöroyīntanyi kīle kintöghoghintonini kakīl Töröröt paraku



ng'wīny; mökoy onyötö kunyar tötutyö Töröröt nko nyinö kakīl chotanyi kīlik pöytoghinto ng'winy.

- Ompö ng'ong'ut kīsīwīyi lö kīkuro chichete, “nyinte nyona töghöy Kristo,” anta “töghinto-Kristo” (Ng'ong'ut 13:1-8)
- Topönee ompö köröwonto sömök lö kīkuro chichete “chipö ng'okī.”

- Ompöwölo töpo nyinte ng'winyu poytagh po onyöt, möng'ösiyi nyinte kitöghöy Töröröt akimötöy ng'winy kitagh ng'ölyonto Töröröt. Tikwıl kekuro “wero kinyart,” ompöwölo karkegh nyinte nko kirwokin.
- Keröto Töröröt kī kwich asis akong'a yim nko ng'winy nyo rel akutö Kristo lee pöytohintenyi.
- Takumī chichi kumukchī kitagh akwich cho möripöcha kegh nko ng'ölyonto Töröröt nko makatenyi, kī kitökön kiwuratanyi nko kinyarat.

*“Nyinte nyi töghöy, akisyol kegh paraku nyinte nyole Töröröt, anta nyinö kisoghöy; Tökütöpö lee Töröröt ompö köpösaghat, akuporī kegh lö Töröröt nyinte.” 2 Tesalonike 2:4*

- Chichī töghöy Kristo kiting'eto kitorötenyi orupö onyöt nyona kimukchī kicheng' pöroyinpö Töröröt (Isaya 14:12-14).
- Topöne lö mwoghöy Paulö lö syolöy nyinte kegh paraku Töröröt akutor lö mīchini kisagh piich nyinte.
- Ompö pöroyinete, mwoghöy piplya lö teköy Yaudi-köpö saghat. Mwoghöy Paulö lö töpo chichete köpö Töröröt nyopö saghat, takisagh piich nyinte lee Töröröt.

*“Mononakwanye so lö, atay kitomitan nko akwa, kyomwowokwa ng'alechetechi? Akiyenyu onkitökwa lö nee nyini kakar nyinte tamanyil nee kepori nyinte ompö pöroyintanyi.” 2 Tesalonike 2:5-6.*

- Nonchini Paulö pipö Tesalonike lö kikikunet nyinte chane ng'alechete lachim.
- Kipka koneti putintön akimwang' chane (2 Petörö 2:1-2)
- Ompö köröwoto 6; mwoghöy Paulö lö, kinkit chane tikwıl lö nee ngo kīmi kiköröy onyöt melet nko tötutkachi ngo igho chochay töghöy Kristo kipayta ng'winy.
- Mikulögh nyo Tiliil nyini köroy onyöt megh acheytanyi.

- Möpösu nye Töroröt chete kwighsyö tökiten kicheng'unö monechi ng'winy. Otini kang'wäsecha amokiminye moning'o mikulogh nyo Tiliil chomi ng'winy, nyoru nyu pöroyin Töghintonay pö Kristo kitigh, kunyaril, akunyar.

*“Ompöwölo kikwigha yenyu lökoyonto ghoghityö: wölo mörumunye yee ntökitenö keng'ong'i nyinte.” 2 Tesalonike 2:7.*

- Mwoghöy Paulö lö tyankoy mitogh pö ng'okä ompö ng'winy. Wingate kiki kirurutyo taghate paytagh; nyoni kiki makat nyopö kegh chö merokocha.
- Otinö litöy ng'winya ng'okitya, kighöghitu tya akichangit sitot. Ipu ng'winya nyu kirwokenyi kegh.
- Mito ghoghityö nko ng'okä kiripkegh nko maketa Töroröt, wölo pkonöy osiswö cho ng'wisöy kanisenyi nko mikulogh nyo Tiliil, amökikörönye napo ghöghityö, wölo pösu kunyara tya.
- Otini kakecheng'a Kanisa nko mikulogh nyo Tiliil ng'winy, mwoghöy puku ng'ong'ut lö pösyini Töroröt onyöt nyo ptagh-kristotin kipayta könyis chole mut nko odeny.
- Pöroyintönoni kekurö pöroyinpö kichopat. Atomuchö pöroyinoni mwoghöy 2 Tesalonike lö Kristo, malaykenichi chö owesöch, nko kanisenyi kënyöponsot napo kurwoyü akuto sitöt chane chomeghancha.

*“Keng'ong'i nyu mwokiyontonay, akuwur Echotyön ompö mikulöghunay pö kutinyi, akunyara löpoyweto löpoyweto king'winatenyi.” 2 Tesalonike 2:8.*

- Owesöch ng'ala Echotyön (Söluut 29:4) Ompö ng'alechi kigh nyinte yim nko ng'winy akienyenyu ompö ng'alechi kewuröy chichetenyi gha (Ng'ong'ut 19:21).
- Ompö kiparastaghata Töroröt, keng'wiso ng'winy akewirchi maa kokay.

- Mwoghöy Paulö lö kiwuröy nyinte ompö löpoyinto king'wīnatenyi.
- Löpoyinto Tīlilyo Kristo nyo wuray töghi Kristo.
- Nane kiyay kigha ompö Paulö ompö woor atay kiwetöy Emau atay kilīwchī nyinte löpoyin pö Töröröt? kipit lee chii nyo kima (Ighisyewut 9:1-4)
- Mioto piich cho ng'olonöy asiswechetchi lee ato muchöy onyötö ntökīporyeghō Töröröt nko malaykonichi, akīmichinecha nyu le kighōnī kesagha tamakar onyötö Töröröt ompö ighisyenyi.
- Nkītunö lö meghnye Töröröt kigh nyo memukōnye atakīpayta.
- Tīng'eto onyötö owesyö kwich kigh nyinö chömu Töröröt ompö owesintanyi atakumuka kusilta keröto Töröröt (Ighisyewut 4:26-28)
- Otinö kamwa Töröröt lö pöroyin, kīmilo Kristo akunyoro Tötutyö Töghi Kristo nko onyöt kunyoröy Tīlilyo Töröröt nko owesyeto ng'alechi.
- Sölwö chii nyoman nyo nonchini lö muköy onyötö kīkarta machata Töröröt.

## **B. Köwechī paytagh kristonay pö putintön.**

*“Itu mwokiyontononi nko owesyö Onyöt atökwigh kiporut kiyasta nko möcheey nko töngönchin cho līsöy piich kupotyö; ghöghitu nyinte atökilīs piich cho kiwonyöy asiyeche ompö oor anka tikwīl. Wonyosoot chane ompöwölo kimalimcha ngalechoni ompö ngörekyö, akimeyitcha ngala man lö pīchighöch tya nyo kitösöru chane. Kīlenyona, kiyonī Töröröt owesyö kipotöt kungwīn kīpöghisyeghō oringwa atökumī kughan ngala putintön. Atökurwokyī asiyeche Töröröt piich cho kimeghancha ghala man, ompöwölo kingörekyini chane ngokikwa.” 2 Tesalonike 2: 9-12.*

- Poru Paulö wölo cheng'toy paytagh Kristo pö putintön.

- Pöghisiyi kile wölo pöghisyo onyötö süköy owesyö kwigh kiporunogh nko töng'önchiin akikuweri putinton nko tisa kumitöy ng'winy kirip nyinte.
- Ompö köröwonto 10, poru keröte nyo muchoy kilisa ng'winy; ompöwölo atoni kikitagh ng'winya chomnyo man nyo kisöruno chane.
- Ompöwölo kitagh piich man, pisyini Töröröt chane kiköryö ntömösöwi man otinö paytoy töghintonay pö Kristo, akilisisyö chane kirip chinte akerwoyü nko nyinte.
- Kimwa Paulö lö ompöwölo kikitagh chane man pa amtaghat, lisöy chane nyu kiporunogh nko töng'öchiin pö köghi Kristo.

*Michinecha keyokyine Töröröt sörö kinomnyö ompö akwa, tupchenichu, akwa chona juchamak Echotyoon. Ompöwölo kikilakwa nyinte alikuna piich cho tagh cho kakisöri, Töröröt nyo kegh mikulögh nyo Tiliil kwighakwa alikuna pikachi ompö kighanat nyo otingetekwa ompö ngölyonto man. Kikurokwa Töröröt ompö aranoni ompö ara Lökoy cho karamach cho kyalimekwa acha; kikurokwa nyinte atosichö kiparat nyo pö ororyo Echotyontenyo Yeso Kristo.” 2 Tesalonike 2:13-14*

- Kimöchöy Paulö kuchichimo kanisa Tesalonike lö lee moning'o Töröröt, ting'eto nyinte kigh nyo siis nyo winyate ompö chane.
- Liso ng'winya akichipö, wölo king'eta otini lee kitoröto ighat, kikil Töröröt monechi kuweri mwatat nyole acheypa mikulögh nyo Tiliil akughan man.
- Kimukecha keghana kuweri acheypa mikulögh nyona retecha akikinkinecha akenyorucha kitiliilöt.
- Kikikur Töröröt monechi kuweri ng'ölyon kighömichö ompö milata ororyenyi, melö kerwokchi chane akewurta akong'a nko ng'winyani neghönöy (1 Tesalonike 2:15-17).

### **C. Kiwang'at.**

*“Kilenyona tupchenichu, oghyongö lasiny atas tagh aghan ngalechoni pö man kikinetakwa, ompö amtaghtancha nko ompö palalyabtencha. Kisoghecha Echotyontenyo Yeso Kristo nko payonyo Töröröt nyo kichamech akī konech payasat nyo pö kokay nko kikönöt nyo karaam ompö areto pöropchenyi, lö tetö mīkulöwekwa payasat akukilokwa atamucha agha osiis lapoy angalana ngal cho isunate.2 Tesalomike 2:15-17*

- Wong'tegho Paulö kīmwoghöy lö, Töröröt ompö monechi kī nyona pö sörünöt, nko pöropchö, muchöy yenyu pipö Tesalonike kīchīchīm nyoman ompö man nyona kikakenet chane (Yoana 8:32).
- Ompöwölo atotas tagh pipö Tesalonike kimīghyö akitomotomon paraku tīkwīn cho ighisyot ompö osiis cho pīnī kī kepestegha nyoni poor, akīlīkī chopata kighanat, akī atoighöy lenyoni kīmemukocha tokunkītī man (Epeso 4:17-18)
- Otinö kalīsecha kinetutpö putintön, ketonecha kemighyot ompö tīkwīn cho onto kakinkītöcha man, melö kölö kīsusocha kegh.
- Soghöy Paulö lö, nyinte Töröröt paponyo, nyo chömech akakīkonecha saghsaghat nyopö kokay nko kikönöt nyo karam kuweri pöropchö, kīlīkī nyo konech saghsaghat ompö mīkulis akuchīchimech ompö ighisyö anka tīkwīl nyo karam.
- Ighö lone Töröröt chete ompö söpencha? Ompö kuntöghoghweche ketyinöcha man nko linyogh nyo satat nko akī ompö Kristo.
- Takumī chomnyo Töröröt nko saghsaghatenyi nyo pö kokay kuchīchim mīchīni kenkītunöcha nyinte nyo tagh.
- Otinö ng'ng'wecha mīkulögh nyinte, kighönöy nyu nyinte akesīk saghsaghat nka chīchīmat.
- Acheypa mīkulögh nyetenyu; mokīmukechanye takesilta kīpuryö makatenyi nko owesyenyi kwugh.
- Ompö tīkwīn lapay, kī acheypa mīkulögh; mökimukechanye kegha ompö owesyencha kegh, atomöminye makatenyi, owesyenyi nko chömunötenyi.





